

Оиша онамизнинг жанглардаги иштироки



12:08 / 14.11.2018 3143

Оиша онамиз розияллоху анҳо жуда ёш бўлишларига қарамай, жангларда ҳам фаол иштирок этганлар. У киши биринчи бор Уҳуд жангидаги қатнашганлар. Оиша онамиз розияллоху анҳо Умму Сулайм бинти Милҳон розияллоху анҳо ва бошқа аёллар билан биргаликда лашкарни сув билан таъминлаб турганлар.

Ўша куни Ислом лашкари билан бирга ўн тўрт нафар аёллар ҳам бўлиб, уларнинг ичидаги Фотима бинти Мухаммад, Умму Айман Ҳабашия, Ҳамна бинти Жаҳш розияллоху анҳолар ҳам бор эди.

Ўша куни бу аёллар ҳам мисли қўрилмаган фидокорликлар кўрсатишиди. Оиша онамиз билан Умму Сулайм розияллоху анҳумо орқаларида кўзада сув кўтариб келиб, тинмай, жангчиларга тутар эдилар.

Имом Бухорий ва Муслимлар бу манзарапларни ўз кўзи билан кўрган саҳобий Анас ибн Молик розияллоху анҳудан қуидагиларни ривоят қиласидилар:

«Батаҳқиқ, Оиша бинти Абу Бакр ва Умму Сулаймнинг пойчаларини шимариб олиб (болдириларидаги халхолни кўрдим), мешларни орқаларига қўйиб ташиётганларини кўрдим. Уларни одамларнинг оғизларига қуийишар эди. Сўнгра қайтиб бориб, уларни тўлдириб келишар ва яна одамларнинг

оғизлариға қуишишар эди».

Жанг тугади. Аёллар йўлга чиқиб, хабар кута бошладилар. Мусулмонлар жангдан сўнг қайтаётганларида Бани нажжорлик Ҳинд бинти Ҳаром Ансориянинг олдидан ўтишди. Унга эри, акаси ва ўғли шаҳид бўлганларининг хабарини бердилар. У бўлса тинмай:

«Расулуллоҳ соллаллоҳу алайҳи васалламга нима бўлди?» деб сўрар эди. Одамлар:

«Аллоҳга ҳамд бўлсин, у зот яхшилар, сен хоҳлагандеклар», дедилар. Аёл:

«У зотни менга кўрсатинглар», деди. Одамлар у зотга ишора қилдилар. Аёл у зотни соғ-саломат кўрганидан кейин:

«Сиздан кейин барча мусибат арзимас нарсадир», деди.

Кейин Ҳинд бинти Ҳаром Ансория эри Амр ибн Жамуҳ, ўғли Ҳаммод ибн Амр ва акаси Абдуллоҳ ибн Ҳаромнинг жасадларини туясиға ортиб, шаҳарга олиб кета бошлади.

Йўлда унга Оиша онамиз розияллоҳу анҳо дуч келдилар ва:

«Бирор хабарни биласанми? Ортингда нима хабар бор?» деб сўрадилар.

«Яхшилик бор. Расулуллоҳ соллаллоҳу алайҳи васаллам тинчлар. У зотдан кейин барча мусибат арзимас нарсадир» деди.

«Анавилар кимлар?» дедилар Оиша онамиз розияллоҳу анҳо.

«Акам, ўғлим ва эрим», деди Ҳинд.

«Уларни қаёққа олиб кетмоқдасан?» дедилар.

«Мадинаға. Уларни ўша ерда қабрга қўяман», деди.

Ҳинд бинти Ҳаром Ансория розияллоҳу анҳо шундай деб, туясини ҳайдаган эди, туя чўкиб олди. У туяни мажбурлаб, турғизди. Аёл уни Мадина томон ҳайдаган эди, у яна ётиб олди. Бу иш бир неча марта такрорланди. У туяни Уҳуд томонга ҳайдаган эди, тезлаб юриб кетди. Аёл уларни Расулуллоҳ соллаллоҳу алайҳи васалламнинг ҳузурлариға олиб борди. Улар бошқа шаҳидлар билан бирга дафн қилинди. Шу ерда Расулуллоҳ соллаллоҳу алайҳи васаллам уларнинг жаннатда бирга биродар бўлганларининг хабарини бердилар.

Оиша онамиз розияллоху анҳо Ҳандак урушида ҳам қатнашдилар. У киши кўпчилик аёллар билан ўзлари қилишлари лозим бўлган ишларга ҳозир бўлиб турар эдилар. Аммо уруш бўлмасдан, икки томоннинг бир-бирини пойлаши билан вақт ўтар эди. Оиша онамиз розияллоху анҳонинг сабрлари тугаб, қўрғондан тушиб, жанг жабҳаси томон бордилар.

У киши бир боқقا кирсалар, бир груп мусулмонлар ичидаги ҳазрати Умар розияллоху анҳу ҳам бор эканлар. Умар розияллоху анҳу Оиша онамизни бу жойда кўриб, ҳайратга тушдилар ва:

«Сени бу ерга нима олиб келди?! Сен жуда журъатли экансан-ку?! Бирор бало ёки тасодиф бўлса, нима бўлади?!» деб тергай кетдилар. Ҳазрати Умарнинг маломатларидан Оиша онамиз «Ер ёрилса-ю, унга кириб кетсам», дедилар.

Оиша онамиз розияллоху анҳо кейинчалик ҳам қуръалари чиққанда Расулуллоҳ соллаллоху алайҳи васаллам билан бирга бир қанча жангда қатнашиб юрдилар.